

CUSSEGL GROND

Sessiun da zercladur 2023

Incumbensa da la fracziun da la PPS concernent ina distanza minimala da rodas da vent (emprim sutsegnader Grass)

Il Plan directiv chantunal Energia, ch'è anc en consultaziun, prevesa en il chantun Grischun 25 parcs eroelectrics en zonas d'energia da vent. Schanegiada da parcs eroelectrics resta mo l'Engiadin'Ota.

Pervia da lur avertura cun vias e cun raits electricas vegnan ils parcs eroelectrics planisads sapientivamain en vischinanza dal territori d'abitadi. Ed han perquai consequenzas negativas per il spazi da viver da la populaziun grischuna.

Las regiuns fitg turisticas èn periclitadas massivamain. Las consequenzas economicas negativas per quest sector economic fitg impurtant dal Grischun na pon gnanc vegnir supponidas. En l'avegnir na sa preschentass il Grischun betg cun cuntradas alpinas libras, mabain sco territori sfigurà.

Cun la procedura dal plan directiv vegnan sutminads ils dretgs da cundecisiun da las vischnancas sco er da las burgaisas e dals burgais. Perquai che tals implants eroelectrics gigantics chaschunan privels e disturbis per tut las persunas che vivan en la vischinanza (p.ex. fiou, crudadas da glatsch, infrason, sumbriva, polluziun tras glisch, traffic), duai vegnir introducida svelta ina distanza minimala pli gronda. Ordaifer il chantun Grischun datti gia tschertas regulaziuns da distanza per la protecziun da las persunas che vivan en la vischinanza d'implants eroelectrics. En Germania vala per exempel ina distanza minimala generala da 1000 m, en il chantun Basilea-Champagna prevesa il Plan directiv ina distanza minimala da 700 m ed en la vischnanca da Hagenbuch ZH ha la radunanza communal gist concludì ina distanza minimala da 1000 m. Il Tribunal federal ha confermà la legitimitad da talas prescripziuns (1C_149/2021, sentenza dals 25 d'avust 2022).

Per la protecziun da la natira datti gia prescripziuns severas (utschels-mezmieur, utschels, bostgs, animals selvadis e.u.v.). La protecziun dals umans gioga dentant apparentamain strusch ina rolla tar la planisaziun d'implants eroelectrics. L'Ordinaziun davart la protecziun cunter canera datescha da l'onn 1986 e las normas per il giudicament d'implants eroelectrics sa refereschan a turbinas da vent d'ina autezza maximala da 30 m. Oz vegnan dentant construidas en Svizra turbinas da vent d'ina autezza da 150 m, en Germania schizunt da 250 m. Perquai èsi pli che inditgà d'introducir regulaziuns da distanza modernas er en il chantun Grischun.

Las sutsegnadras ed ils sutsegnaders incumbenseschan la Regenza:

Per planisar e per construir implants eroelectrics (autezza dal mosel da 30 m e dapli) sto vegnir observada ina distanza minimala da 1000 m davent d'ina immobiglia che vegn duvrada temporarmain u permanentamain.

Claustra, ils 15 da zercladur 2023

Grass, Hug, Gort, Adank, Bärtsch, Brandenburger, Butzerin, Candrian, Casutt, Cortesi, Della Cà, Dürler, Favre Accola, Hefti, Koch, Krättli, Lehner, Metzger, Morf, Rauch, Roffler, Salis, Sgier, Stocker